

京營巡視事宜敘



國家設三大營屯宿重兵藉為



神京擁衛其關於根本甚大邇
年承平久人情玩愒百務廢
墜上下以文具相蒙即營兵
十餘萬人名籍固在也而隱

占者半役私門老弱者虛糜
公帑幾莫可究詰卒有緩急
將誰賴焉而能不厘杞人之
憂哉

祖宗于營務既設摠協大臣又
勅省臺各一人特司察視謂是

耳目之臣一切奸弊靡所容
凡事關兵馬錢糧及將領殿
最無不得問者責至重也故
事省臺之使三年一代得以
從容展布後更為一年則受
事未幾瓜期已迫營中諸務

稍見端倪匆匆釋負去矣雖
欲不遽廬此差庸得乎往歲
丁未不佞亦承乏會臺差缺
人獨力肩之一年間雖汲汲
皇皇拮据良苦自覺不給無
裨營務之分毫迄今有餘愧

焉若吾友濟美則真無愧察
視之任者也濟美有兼才而
一片任事實心肫懇篤摯不
佞居平遜服不敢鴈行癸丑
春先從事棘闈蒐拔最精得
人獨盛甫撤棘又領營差當

濟美領差時視往年奉

命之期且遲三月矣而未幾臺
差亦缺依然獨力也人謂茲
役也即奔走之日其能足乎
乃濟美戴星出入不辭勞瘁
旬月間周遍各營所至稽核

簡練殫竭心力燭弊如觀火
號令如迅雷三營將士凜々
奉約束壁壘旌旗皆變矣至
于點閱

九門軍士清查勇士四衛等營
往年多示遑而濟美足臨無

所不到諸所摘發條列鑒之
中竅內璫窟穴其中者皆縮
頸吐舌莫敢誰何雖

聖明尚稽英斷而當此極重不
可返之日有濟美之謹言在
他日脩明

祖制剔蠹釐奸實為嚆矢功在
國家大矣濟美復不遑暇逸每
穆然深思若有所不釋于衷
則又商諸不佞曰夫方策者
事之徵也前事者後之鑑也
省臺專司察視職掌甚鉅端

緒甚夥而問之署中則故籍
皆烏有每一官受事胥史輩
抄謄數葉聊以塞白中間踈
脫謬戾多堪失笑奚以便稽
考而詔方來不佞爽然自失
謂此一舉也有志未逮者也

徵濟美何能為不朽盛事于
是濟美復殫三月之力上稽
典制下搜故實凡尺楮寸牘有
關營務者手自纂集彙成一
編而就中刪其繁蕪補其缺
畧大綱細目條析縷分蓋一


展卷而京營事宜燦然若指
掌也即後來因革損益間有
異同而成規具在靡出今日
之範圍矣胥史輩即欲恣行
胸臆安能復去其籍而蒙上
之人以所不知耶故此一編

也又振飭營務之大要也不
佞受而卒業不覺掩卷三嘆
念濟美之領營差也時既逼
迫力復單孑藉令苟且塗飾
亦可僥倖于釋負而濟美數
月之內既于營務無不脩舉

煥然更新又得賈其餘力勒
成一書以昭示將來信非有
兼才而又有任事實心者不
能及也假令司察視者得如
濟美即周歲而更已無不給
矣何待三年哉不佞非但為
濟美頌且益以志吾愧也因
弁其端如此

萬曆甲寅仲春朔日

海虞翁憲祥兆隆書



京營巡視事宜自序

語云不習爲吏視已成事此
言雖小可以喻大況京軍數
十萬有奇將領偏裨而下七
百員有奇糜費太倉廩歲幾
百萬

朝廷以科道耳目之臣付之巡
視聽其殿最聽其簡閱此何
等大事而可以不習嘗試之
同于兒戲已哉余寡昧不習
韜鈴癸丑承乏是役奉

命最晚春操僅一二進營茫如

也會侍御史伯直艱去臺彥
無人余孑焉獨任一切營務
署中絕無文卷可查四五吏
書又皆新役問之張目不能
答即答亦不中窾更覺憤
余乃廣詢博訪每一事必窮

其源委久之漸有頭緒而秋
操告竣年終復

命近矣所欲行者未及行所欲
革者未及革匆匆報完祇了
故事余自忖不愜于方寸乃
取其急者條為八議

奏之其餘細大不等各集成紙
皆與營務有關者不忍棄也
屬甲寅正二月尚未得代乃
撰冗稍次第之分門析類曰
勅書曰會典曰營制曰數目曰
巡視曰儀節曰日期曰規則

曰循環曰會同曰馬政曰班
軍曰賞罰曰奏繳曰軍政曰
大閱曰雜事曰紀要共一百
三十四條雖掛漏甚多而芻
蕘可脩將成又得虞城楊公
京營紀二冊印正之昔行而



今廢者甚多因益嘆成事之
不可不知而惡害已者之利
于去籍也乃並採而存之名
曰巡視事宜亦若戎政事宜
云命坐營劉光化校梓備後
之同事者攷鏡焉

告

萬曆四十二年歲次甲寅二

月望日

濟南張延登濟美撰



巡視京營事宜目錄

勅書

嘉靖四十二年一道

萬曆元年一道

奉勅旨以振營務告示

二會典

營務十九款

馬政一款



班政二款

四衛營六款

巡捕營三款

三營制

沿革二條

四數目

各營軍馬十條

五巡視

沿革一條

六儀節

上任儀注

看營儀注

將官相見

會同看閱

七日期

校文日期

問寺牧放

授遞文移

春秋看閱

八規則

免朝叅

春秋閱視

營操分屬

教演箭簿

禁止侵尅

作養勲官

點閱次數

官軍銷名

內直舉刺

營衛文冊

查盤錢糧

捕營換班

失事查叅

送問掛號

巡捕專屬

委官掛號

點閘門軍

稽查門軍

查盤柴炭

外解掛號

脩理買辦

准理詞狀

承行兵馬

存恤新軍

九循環

戎政府銀庫

三大營地租

三大營軍馬

三大營犒賞

三大營椿棚

各營逃故

捕營犒賞

捕營賊情

勇衛子粒

各衛逃故

太僕銀庫

各城贓罰

稽查聽用

斗會同

陞補定例

勲爵教習

會補選鋒

替補新軍

十一馬政

沿革大略

倒失驗割

捕營買補

捕營轉兌

年終印烙

十二班軍

班政沿革

銀糧額數

月糧分屬

考覈查放

十三賞罰

各官規格

軍士規格

火器規格

勇衛各官規格

軍勇規格

十四奏繳

年終復命

十五軍政

五年考選

十六大閱

沿例三條

十七雜事

紙張季領

將官患病

文移體式

刑具紙劄

公署房租

例送燭炭

瞻拜酒席

營官獎勵

解官獎戒

額設員役

年終犒賞

陞轉犒賞

公署建置

醫官查點

十八紀要

稽查四衛營馬匹

議設替補良法

練火器以精長技

清查捕營軍馬揭

慎重盜情示

目錄終

勅書

勅巡視京營給事中

朕惟京營戎政所繫任重近年營務日就廢弛

朕特加脩舉遵復

祖制仍五軍營易三千營為神樞及神機為三大營

其餘諸營舊哨司掖去其瑣列設總督大將及協

理文臣各一人各營有副將叅遊佐擊練勇等官

分領兵馬操練但恐各官不能體國奉公仍舊賣

放私役科剋作弊額數徒存虛費糧餉不堪調遣

如此朝廷何賴焉今特

命尔給事中同監察御史巡視京營尔宜查照兵部題准事理專一前去各該營伍不時巡歷用心點閱凡各營軍士缺少及操練不如法馬匹瘦弱器械不精貪賄科尅庸懦不職者將領官員無論大小悉聽尔年終指實叅奏以憑究治其徵追椿棚銀兩俱赴尔處掛號並置簿稽察如有造報不明希圖侵匿及巡捕官軍倒損馬匹俱聽尔查叅巡捕將官照依京營事理一體舉劾朝廷以尔為耳

目之官特茲委任尔宜殫厥心力除革奸弊俾戎政脩舉斯稱任使如或視為泛常撓於權要畏避不言因循故縱罰不尔貸其開操之日暫免朝叅事畢如故仍照舊例每年一換尔其欽承之故勅

廣運

嘉靖肆拾貳年柒月初玖日

之寶

道勅同內止易命尔監察御史同給事中巡視京營

勅巡視京營給事中

朕惟京營戎政國家重務

皇祖考世宗皇帝遵復

祖制仍五軍營易三千營為神樞及神機為三大營
其餘諸營舊哨司掖去其瑣列設總督大將及協
理文臣各一人各營有副將叅遊佐擊練勇等官
分領兵馬操練法制甚脩但恐文武各官不能體
國奉公仍襲舊弊清查不實訓練無方徒費芻糧
不堪調遣今特

命尔與同監察御史前去巡視尔宜查照兵部題准
事理不時巡歷用心點閱凡各營軍士缺少及操
練不如法馬匹瘦弱器械不精貪賄科剋庸懦不
職者將領官員無論大小悉聽尔等指實叅奏以
憑究治朝廷以尔為耳目之官特茲委任尔務殫
厥心力除革奸弊俾戎務脩舉斯稱任使如或撓
於權要畏避不言因循故縱罰不尔貸其開操之
日暫免朝叅尔其欽承之故

勅

廣運

萬曆元年肆月貳拾壹日

之寶

道 勅同內止易命尔同給事中前去巡視
奉

勅旨以振營務 前給事中楊

伏讀

勅書開載凡各營軍士缺少操練不如法馬匹瘦弱
器械不精貪賄科剋庸懦不職者將領官員無

論大小悉聽爾指實叅奏以憑究治欽此夫營
務重鉅

勅旨森嚴本 科受

命以來昕夕兢兢惟弗勝是懼顧各官潔已恤軍恪
脩職業者固多而尸位素餐闌茸廢事者豈少
卽在承平無事之時尚厯桑土綢繆之慮矧今
淮北河南盜賊蜂起東倭北虜羽檄交馳此其
時事可憂為何如者凡我將士世受

國恩可不扼腕思奮猶然泄泄為哉為此示仰各

營將領等官務要廉仁持已謀勇兼人紀律尚其嚴明勿以姑息而致懈怠賞罰貴乎信必勿以恩怨而有偏徇行伍令其充實勿以假冒而應虛數在軍士則訓練以法各習一藝各擅一長人人皆驍勇無敵在馬匹則芻牧以時毋擅撥送毋私顧覓一一悉騰驤可用一切器械及時整脩務要鮮明堅利足壯軍威一應錢糧秉公給散毋得尅減侵漁以招衆怨治國事無異家事撫士卒如撫嬰兒共圖戰守之洪猷期收

安攘之實效各官果能矢心殫力建豎可觀本科道自當特薦優擢決不相負如有貪婪不職自甘下流者體訪得出卽不時指實叅究斷不輕貸尚其慎之尚其念之

會典

營政 採其切於巡視者錄之

凡勲臣隨營嘉靖二十六年奏

准行令巡視京營科道通將公侯伯及都督等官嚴加考覈叅舉以憑從公推用

嘉靖四十二年議

准在京五府新襲公侯伯未經管事年三十五以下及各爵應襲不拘年齒長幼俱送京營聽戎政文武大臣定以日期隨營較射仍授武經百將傳等書令其熟讀細講先將收管姓名具奏每歲終巡視京營科道列其勤惰勇怯奏

聞

嘉靖四十三年題

准京營科道會同戎政大臣將隨營勲戚每歲較試

二次其弓矢策論習熟者附記在簿遇有營中叅遊坐管缺照例酌量推補未諳練者行戎政大臣督責戒飭

嘉靖二十九年又議

准神樞神機二營餘下將官十員所統兵馬不足一枝之數行總協大臣會同巡視科道將五軍營備兵再行揀選交與二營將官十員每員領三千名與先次選定將官二十員共兵三十枝用心操練精勇者作為先鋒

嘉靖四十三年議

准總協大臣每月以初一初八十五二十三合操其餘二十六日各營將官分練各兵總協大臣及巡視科道不必同在一處隨意各入一營較閱賞罰

隆慶元年議

准三大營內弓箭鎗刀火器等藝各擇精熟者立為教師上等每月加糧六斗次等者每月加糧三斗教成全隊給冠帶充名色把總一半者給賞

訓練
立教師

銀牌花紅十數名者姑准附過全無教練者重責革去教師名糧把總領二百五十人千總領五百人教練有成即當優薦聽補中軍號頭員缺十分之五從厚犒賞十分之三亦准附過全無教練即行住俸各營將領但有全營教練者加以都督僉事若副將加以都督同知若止教一半者從厚獎賞三分之一者照常供職十分之二者重加罰治全無教練者降祖職一級革任回衛三年之內三營補練著有成效兵部議

觀此則總
協為政

摘牌替役

請將總協大臣請

勅獎諭仍加恩錄如無功績巡視科道叅論兵部酌
量教練分數并議黜罰

嘉靖三十年議

准行或政文武大臣會同巡視科道并兵部驗軍主
事清查京營老弱軍士各帶應繼應替精壯戶
丁審驗明白即與摘牌

嘉靖三十三年議

准兵部委司官一員會同巡視科道督同副叅遊佐

等官審驗各營正備兵將大小衛分相兼搭配
務令一衛專隸一營或多寡不齊務將一所盡
屬一營精壯者作為正兵老弱者作為備兵以
後遇有各衛告補及清解首逃軍役及營操官
舍聽驗軍主事悉照編定營伍分撥號頭等官
查照遵守

嘉靖四十二年議

准劄委司官一員會同巡視科道督率各衛掌印官
備將各營正兵及原屬衛所每營每衛各攢造

文冊一本營中據冊稽查衛中憑冊支餉後有
逃亡事故即行開報在衛即與住糧容隱者送
問

嘉靖四十二年又議

准戎政大臣會同巡視科道每營挑選武藝精強者
列為一等秋操口糧增支六斗武藝生疎膂力
尚堪教習者作為二等止支口糧三斗

成化三年令各營官軍糧冊每三年兵部委
官同科道官清查凡軍士有事故者每季委官

查勘三箇月一開報操官在逃者每月類叅

嘉靖四年令點營科道并驗軍委官備查團
營官軍每營務足一萬之數今後凡有興作不
許擅便奏討坐營號頭把總等官仍要加意撫
恤有私自影射及額外役占俱退出原伍差操
違犯者科道官指實叅奏從重究治

嘉靖二十八年議

准三大營官員除三千營隨

駕執事五軍營內圍子手神機營內五千下各係土

直其餘把總等官五軍營三十九員革一十二員神機營五十六員革一十四員以後坐營官缺兵部推舉或將見在別營官員事務簡者量為兼領其把總官員查照舊例每軍二百五十名方設一員如遇員缺提督文臣會同該營提督巡視科道等官選補俱務在得人不必拘泥原額

嘉靖四十三年議將京營將領每遇年終科道復

命之時戎政大臣會同考閱一次以定臧否兵部官不得干預其正當閱視之年歲終免其重閱

隆慶四年議

准秋操歇日提督大臣會同巡視科道將各副將以下至把總管隊隨伍等官大加閱視具奏

萬曆四年議

准該營千把總員缺總協大臣今後查巡視科道疏薦者酌量題

請充補未經疏薦者不得濫用

選鋒

戰兵中營三
營缺盛而城
守以之備為勇
士四衛則復次
弱影也矣

萬曆五年題

准革去家丁名色。通將各營精壯軍丁。選驗改為選鋒。六副將各與三百名。十戰兵營。每營增設三百名。車兵十營。每營各增二百名。每月給雙糧。各統以把總。時常訓練。總協科道。不時簡閱。

隆慶三年題

准總督跟伴不過二十四名。書算二名。副將不過二十名。參將不得過十八名。號頭不得過十名。以上各書算一名。中軍千總不得過五名。把總不

得過四名。違者聽總協及巡視官參奏。多五名降一級。十名以上降三級。二十名以上罷職。不敘。仍發邊衛充軍。賣放包納。悉准此例。勲臣應襲難同見任一體裁革。近年每季於班價內題

請支給

嘉靖四十三年題

准京營軍士刁潑成風。藐視將領。按帖訐告。甚至兵馬司輒行拘執。弓兵番子凌虐百端。今後軍士敢有仍蹈非者。拏問重究。將領貪婪失職。戎

政大臣巡視科道不時論劾不得輕准軍士告
詞有傷大體

隆慶二年題

准戎政大臣將營中各項銀兩仍入庫收貯就於營
操官內選擇廉幹者一人專司其事凡遇犒賞
公費量數給發其樁棚銀兩依期呈報戎政衙
門貯庫季終差官類解太僕寺庫仍置文簿付
本官收掌逐一登記錢糧如有侵漁聽巡視科
道不時參論

隆慶五年題

准營中子粒銀兩俱要責令該管官員赴巡視科道
官掛號方許支用有那借隱匿者聽科道官叅
究

馬政

萬曆四年題

准每上半年於住操之時看驗一次下半年於印烙
之時照舊規稽查通行部寺科道各官會同五
軍巡捕等各營馬匹通行檢驗一次瘠損者懲

治老弱者變賣。屢懲不悛者，轉允別軍。本軍從重究治，以示懲戒。

班政

嘉靖二十九年題

准凡班軍臨解之時，不行拘集齊足，唱名交付者，即係各衛所掌印官故縱。各該守巡等官督責欠嚴，若照數唱名交付，領班劄付官都司管領起程，而復不到營者，即係劄付官領班都司賣放。在京聽京營巡視科道舉劾，叅送法司在外聽

巡按御史叅奏提問，照少軍分數問擬。

嘉靖三十一年議

准山東河南各添註僉事一員，專理班務。南直隸即以穎上僉事兼管，各請

勅行事。其僉事會同都司掌印官精選班軍點付領班都司押領赴京，缺少違誤，聽兵部撫按及巡視科道叅劾，僉事免其赴京。

四衛營

凡軍士清查，弘治十八年令兵部侍郎會同科

道官清查四衛軍士今後遇有進充及補役復役俱有兵部審勘驗發方許收糧如有作弊本身并該管官旗問調南方極邊衛分

正德十六年

詔四衛勇士除弘治十八年經兵部科道清查見役正數并事故外其餘詭名冒籍未經裁革仍又黃緣回衛虛掛名額者各照原擬軍發原衛民丁發在京缺軍衛分各充軍役食糧差操以後勇士替補照例開送兵部委官處驗過方許收

糧

嘉靖八年又議

准騰驤左等四衛官旗勇士軍人行點軍科道官照例點聞

嘉靖四十三年議

准行御馬監太監將應操軍士如法訓練果有成效聽兵部將原缺人役陸續驗補椿棚子粒錢糧仍聽科道查理

隆慶元年題

准騰驤等四衛勇士查照嘉靖八年事例請
勅兵部侍郎會同御馬監巡視京營科道逐一清查
不許詭名頂替虛糜糧食

萬曆二年議

准各營見操軍勇務令一一着伍影射者聽巡視科
道叅究

巡捕營

嘉靖四十三年題

准巡捕營新抽操軍三千名仍令督捕郎中公同提

督查出與同別軍分為兩班上班夜巡下班操
練如仍前役占聽郎中併科道叅究但有地方
失盜該管把總即報兵部督捕郎中仍登記文
簿以便稽考如果失事數多將提督官一併叅
究

萬曆三年又令巡軍拏獲盜賊該營審取贓
証真實兵部并京營科道覆審的確批發該城
兵馬司備錄批詞將賊併贓送法司問理巡軍
聽其即回地方巡邏不必拘留待對居民被盜

盜賊

當時喊叫官軍不與緝拏者方許具告聽提督官比併把總嚴限緝拏如過三日後告者不准凡犯夜之人聽巡軍拏送提督發落

萬曆十二年題

准凡京城內外遇有賊盜竊發自卯至申責成兵馬司屬巡城御史叅究自酉至寅責成巡捕營屬巡視科道叅究但遇失事之時立刻申報不許遲延隱蔽賊情重大仍要協力捕剿毋以晝夜推諉應緝盜賊查自何官捕獲各論功敘錄

營制

沿革二條

初

高皇帝定籍留守等四十八衛之衆而訓練之有中軍有左哨有右哨有左掖有右掖而總之曰五軍永樂時仍五府之舊增七十二衛又以龍旗寶纛等物下三千胡騎立三千營後征交趾得神鎗火箭之法立神機營是為三大營河南山東大寧中都四都司之軍又歲以班操至洪宣

營制沿革

之世海宇昇平。至於正統。嬉恬益甚。於是已有已之變。于肅愍深維良策。廼於三大營之中。拔其驍銳。分為十營。營萬人。天順初年。革團營。八年而復。成化初。再革。二年而復。又增為十二營。曰奮武耀。武練。武顯。武曰敢勇。果勇。效勇。鼓勇。曰立威。伸威。揚威。振威。營萬人。京兵八萬。益以外兵八萬。分兩班隸之。期年一報代。庚戌之變。虜叩郊關。都門晝閉。

世宗皇帝震怒。責令廷臣。博謀所以強兵禦虜之略。

廼復三大營。改三千為神樞。統以勲臣。督以樞臣。巡以省臣。臺臣。規制為備。著為令云。

按隆慶四年。大學士趙條議欲收戎政之

印。復五軍之舊。隨該兵部尚書霍上議曰。法

未至於大壞者。無貴於紛更。議有涉於異同者。

當從乎衆議。今京營之制。總之為三大營。以統

其綱。析之為三十小營。以理其目。兵柄不偏於

一將軍。法不專於一人。有合操。有分操。有春秋

閱視之操。有歲終考覈之操。此正

要訣

皇上所謂分營練兵係

祖宗舊制聖子神孫所當欽承而勿替者況在廷文武諸臣多謂京兵之訓練不在於營制之更張而在於將佐之得人操練之如法似皆探本之論臣等叅酌羣言竊論三大營仍舊則將領不增而占役少號令不煩而統紀明似屬穩便仍

照

祖宗三大營分營操練而以文職大臣一員量加職銜俾之總理每歲無事則居營訓練有警則總

兵掛印出征事完回營照例繳印中間未盡事宜聽新任督理大臣及巡視科道官逐項查酌另行條議以聞得

旨營制既經多官會議明白俱依擬行數目

各營軍馬見在數目十條

三大營官軍選鋒共十萬七千六百二十員名

馬一萬九千八百五十匹

勇士營官勇三千四百十二員名

馬一千二百十二匹、

四衛營官軍六千九百九十員名、

馬四百四十四匹、

巡捕營官軍一萬一千一十八員名、

馬五千一百八十七匹、

正陽等一十六門官軍六千八百二十五員名、

以上軍馬就見在者言之非原額數也而就此見在之數影占尚多如三大營之占全在備兵近亦及於戰車等營本科已有

清冊批營復經具題至於門軍勇士四衛營則幾全占矣所餘止空名耳二項本科俱有專疏亦已經部覆候

旨若捕營之水夫大馬等項本科執查更嚴此巡視第一義也

巡視

沿革一條

國家設團營以壯軍威勅科道以振弛惰昔在天順時則易之惟月在成化時則易之惟半

載弘治十一年題

准一年一換不許別項差委逮嘉靖丁酉

詔自今必科道有風力者乃任必受

璽書乃以行事必三載乃易至二十九年九月內該

兵部等衙門會議題稱點軍科道官查照弘治

十一年題行事例一年一換至三十八年該戶

科等衙門給事中等官蘇等條議復以三

年一換至四十二年間該刑科等衙門給事中

等官陳等題稱巡視科道官三年一換相臨

日久人心玩愒仍照弘治十一年例一年一換
滿日造冊奏繳著為定例嗣後並無更易

儀節

一上任儀注

舊差先至公署廳差官迎請先發

勅印到廳擺設候新差到引禮官導引至後堂舊差

接至影壁後相見茶話畢禮官稟吉時請更衣

上任舊差送至影壁後躬別禮官導引至案前

望

闕行五拜三叩頭禮畢祭

土地之神上香行二拜禮獻爵復行二拜禮化財禮畢迴至廳上拜

勅印行四拜禮畢新舊差更相酬拜新差居左行二拜禮請舊差居左又行二拜禮畢送舊差至影壁後躬別禮官稟陞公座各官照序見畢後堂公宴而別

一看營儀注

先數日總協差官帖請看營至期科道同進至

弘慈寺候差官再請方進營徑至北官廳下馬總協出廳迎接一躬遜至後堂作揖序賓主坐號頭官見茶飯畢掌號令官稟陞堂同出前廳序爵而坐掌號令官稟吹號笛臺上搖旗各營將官作四揖一躬而退應襲侯伯見作四揖一躬而退掌號令官稟各營中軍等官擺上見畢掌號令官發放各官下地方去號頭遞營單總督舉筆議點某營號頭傳監陣官演營引禮號頭遞侯伯箭單各九矢射畢協理出論題命某

官監試於別營廳掌號令官稟開營門四門冲
演掌號令官稟請上太平車今車廢用騎聯轡
並行看畢回後堂公宴

禮節

一將官相見

副將出入由中門參遊佐擊坐營走脚門俱接
至滴水一躬本差前行到堂左上站立答一揖
一躬仍前行送至二門外一躬進入甬道邊一
躬仍候到地屏南向一拱各官始行

其三都司勇士四衛營坐營官在簷下相見南
向答揖不接送

其號頭中軍千把總等官相見答揖坐下問事
一會同看閱

春秋看營年終小閱凡前後接送與後堂公宴
俱總協為主巡視為客及陞廳用事則照衙門
序坐

日期

一校文日期

每月定於二七日進署科逢二道逢七

一問寺收族

太僕寺收放錢糧原有定期後因循改換以致解官守候不便今新議定每月遇初八二十三日科道輪赴收放如無錢糧該寺先日差官稟知

一投遞文移

三大營并勇士四衛管子粒循環上下半年倒換

三大營賊罰犒賞循環上下半年倒換俱限夏冬二季終

三大營巡捕勇士四衛營軍馬循環四平冊每月初二日投換

三大營椿棚并勇士四衛營巡捕營椿銀循環按季倒換

五城兵馬司賊罰循環按季倒換

太僕寺常盈庫錢糧文簿按季倒換

各管草料批冊俱限前一月中旬掛號

七十六衛所糧冊批廻俱限前一月下旬投遞
過期查究

一春秋看閱

每年春操四月終旬戎政衙門請看管一次秋
操將住又請看管一次十一月二十日後請閱
視各官一日馬箭一日步箭俱係六矢今馬箭
不知何年停而號頭以上俱增九矢分閱之法
隨便舉行其應處各官例係公同但比戎政差
多且有獎戒一款其閱視事體每年一小閱三

規則

年一大閱大閱之年即免小閱

一免朝參

凡開操之日遵照

勅內事理道科行手本該科註籍

一春秋閱視

三大營輪操五日該二日演營止有三日比較
武藝進營點軍後隨調營官射箭其軍士弓箭
短兵火器分營抽試或互批各將官調試呈單

開操事宜

馬箭
六要
練習

照例賞罰

一營操分屬

三大營每旬各照營分兩班分操五軍備兵營屬之上班樞機兩備兵營屬之下班五軍標兵營在大教場神樞十一營俱在東教場神機十一營俱在西教場勇士四衛營係上五日操神樞八營係下五日操

一教演箭簿

開操以後大營教操官於月終投遞勲爵官舍

箭簿即時驗發

一禁止侵剋

各營單糧選鋒春秋二操每名給修理器械銀三錢尚不足弓矢之費近訪得中軍把總等官肆意侵剋需索季銀致使各軍不得實惠相應禁諭

一作養勲官

勲官乃係世胄代受

國恩各宜熟習韜鈴綜核戎務以備他日屏翰之

資今議定規則俱照依聽用官三日一齊進營騎射操練其不進之日務讀武經十行以憑本道制籤背誦以驗勤惰果有長進不吝薦揚無志者各歸私第毋得混擾營規

一點聞次數

點聞各營官軍科初次相會同進以後各隨便進營出德勝門洪慈寺出安定門極樂寺各暫憩吏書班皂量帶兩三人仍嚴禁以杜科索

一官軍銷名

遇二七日俱赴公署廳銷名初限五棍以後遞加若有事故等項驗該衛所印信手本准銷至三四次俱要呈報如未完者照數比較中軍千把總識字

一內直舉刺

圍子手明甲把總向屬京營科舉刺萬曆三十五年惠安伯條議圍子手等軍不入營操兵部覆

兌本內未及各官舉刺一節車駕司徑移文科遵照

謂各官不屬京營衙門該前任科翁 移文車
駕司改正

一營衛文冊

三月初旬牌行各營衛取官軍年貌相同文冊
并巡捕把兒冊以備不時查考其冊紙張工食
甚屬繁費春操完日將原冊發營官軍更替者
不妨補換秋操不必另造所省為多

一查盤錢糧

營中額設錢糧供營中諸費而犒賞三軍激勸

武藝實為首務近訪得典守之官不飾簠簋取
潤橐囊冒開花費分毫不逮貧軍殊為可恨每
遇年終宜將本年用過錢糧逐款清查但有冒
破定行叅究

一捕營換班

每月科二十一日道初六日大點叅將先一日
差把總官具手本請點軍馬傳至天壇兩傍擺
列內有老弱不妨陸續摘替其頂補之軍必驗
年力精壯及有身家方可每年兵部職方司會

同挑選一次近年止有萬曆丁未前任科翁
舉行今不復舉大點常期若遇雨雪傳免

一失事查叅

巡警地方捕管與五城分任其責晝則兵番夜
則軍哨如有失盜即批該營叅將緝拏或限內
不獲並查城捕所報行盜時候賊數多寡照例
題叅如當時人賊並獲止解審送問不題可也
凡地方盜賊及走空打詐等項該總例先稟報
限十日內呈解本道科究審發落毋得稽延留獄

違者提究

一送問掛號

捕管呈解賊犯例發西城兵馬司抄供送問舊
規俱係下廳掛號隔越數多恐有疎虞隨酌為
權宜行文該司凡遇送問人犯即時備抄供由
許於次日齎赴寓所掛號尚可及刑部投文之
期庶無留獄

一巡捕專屬

巡捕把總俱屬京營巡視提調所獲賊犯只解

巡視衙門並與別處無干三十五年間中城察

院移文各總侵奪職掌該前任科翁查照會

典移文改正且巡捕把總係

簡命官自有專屬如有被人告訐各衙門不得亂行

提問挫辱須開具緣由知會本差果係干礙本

官方行發放

一委官掛號

每月各衛管放巡軍月糧委官齎冊一本執結

一張赴署掛號方准赴戶部下糧廳驗實坐糧

其軍冊存案以便稽查隱匿

一點開門軍

正陽等一十六門官軍俱隨便查點不到者提銷

老弱者更替

一稽查門軍

各門官軍防守重地責任匪輕本科按臨守門

官軍各要腰懸年貌疤痕圓牌手執長大木拉

時常把守以憑點查如遇面生可疑之人詰究

得實即便申解以憑重處如假託浮使名色仍

喫索

保不許因面
付索生事

京營巡視事宜
前怠玩不到軍則行衛住糧官則指名叅究

一查盤柴炭

舊規每年五月終該查盤柴直柴炭銀兩兵部武庫司先將收放卷宗同青冊送署查明定日在西

朝房內會集左右堂陪查例有公宴并送心紅紙劄近改年終查盤一次

一外解掛號

各司府衛州縣官管解柴直馬價等項銀朝

見後例赴本衙門掛號俟交納之後仍赴銷號如有違限三月之外者照例送問

一修理買辦

營中如有修理及武場買辦動支子粒銀兩預先呈明批允候事完之日即便造冊繳報如中間有冒破即行查勘四十一年九月正會試之期該營竟不呈報已經中飭

一准理詞狀

凡各營衛貪酷官員并錢糧軍機重務及地方

強竊窩家走空不法等事許據實直書告理若
戶婚田產不干軍務者不得混行告擾其營軍
祖籍關係外省直者俱得批發各處清軍廳及
各州縣問理然批詞須過詳慎寧少無濫

一各營衛官軍凡告前項利弊俱隨放告牌進
情輕者批該營衛問理如賊情重者批各城兵
馬司提問果情法難容審確批司抄供送問若
彼此俱罪及枉法贓不應給主者批西城兵馬
司收貯聽候支銷仍登記循環簿每雙月倒換

以憑稽查

一承行兵馬

西城阜財坊

中兵馬大時雍坊

東城南居賢坊

北城關外坊

南城宣南坊

一存恤新軍

各處解到新軍存恤之後職方驗軍主事關送
該司於次月初二日轉送手本二箇存案查新
軍到營大號頭點發三備兵營管領俟後大營

缺伍陸續補充其所稱罰操舍人乃係弟侄等項接輩襲替恐其不諳操練故發五軍備兵之次撥營即所謂殫忠營也近此項不見舉行曾問之存恤科趙云近來祖軍解到者甚少一年存恤不足數人耳愛禮存羊聊識於此、

循環

戎政府銀庫

稽查存貯在庫各項錢糧以祛宿蠹三大營春秋操練犒賞銀兩先經另有循環登報外所有

各項餘剩數目及各官陞遷扣除軍伴似應置立循環每季倒換以便稽考、

三大營地租

五軍等三大營舊有地租房租及葦稅銀兩原備各衙門公用油燭煤炭紙劄工食等項應置循環文簿春秋二季投查、

三大營軍馬

各營官軍馬匹分隸各司虛冒役占弊端滋多且各營官軍更調紛紛通不呈請馬匹雖月有

四平止造倒死而不及轉兌相應總立軍馬循環文簿責令按月填換以便稽查其每月馬匹四平文冊不必另造以省冗費

三大營犒賞

三大營每年春秋操練合用犒賞官軍修理營廳置造金鼓旗幟等項於太僕寺寄庫子粒銀兩內動一萬兩至萬曆二十二年又該前任巡視科楊題添犒賞銀六千兩亦於太僕寺關領通融犒賞循環文簿春秋二季投查

三大營椿棚

各營馬匹倒死例該分別官軍備查原領日期照例追椿暫封府庫每季類解先赴本道掛號轉赴太僕寺交納四十一年七月內該太僕寺少卿何題改抵軍伴竟不掛號本科已查明申飭照舊赴掛

各營逃故

旗手等七十六衛所官軍散隸各營操備中間或有逃故者數月方行開除收補新軍徇私賣

放或經年不進管操多方役占以致食糧者多
赴操者少弊端百出管務漸弛先該巡視京營
兵科等衙門給事中李等題為遵舊制守成
議崇簡尚實以興戎務事內一款簡省虛文以
各營循環備填一本將本營官軍覈其實數於
各四柱下明開逃故新收等項按月倒換以備
稽考

捕管犒賞

先該前任_{道科}題議量分兵部賞功銀一百兩

有功軍番該兵部覆議前銀額有項數合於太
僕寺子粒銀內聽巡視_{道科}動支一百兩以備獎
賞二十一年又該前任_{道科}為犒賞不敷題添二

_{共三百}

百兩俱於太僕寺關支有功軍番官以獲賊多

寡分別等第具揭呈稟本_{道科}候批准給賞動過

銀兩照數填報循環冊二季倒換

捕營賊情

查得問刑條例內一款

京城內外關廂街巷但有嚮馬強盜白晝行劫者

巡捕把總等官。兩箇月以上。不能捕獲。降一級。調外衛。分管地方官員。俱住俸。責限緝捕。若行劫。不於白晝。及雖係白晝。離城寫遠。空野去處。被劫者。巡捕把總等官。各住俸。與分管地方官員。俱責限緝捕。內得獲免罪。不獲送問。一年之內。積至五起以上。仍降一級。十起以上。降二級。俱調外衛外任。近來巡捕等官。漫不經心。地方徃徃失事。甚非法紀。合行申明。置造捕盜循環。備開失事地方。年月日期。分管叅將。把總。旗牌。

軍哨姓名。及失主賊杖。已未獲。強竊盜賊籍貫。按季倒換。以憑查考。

勇衛子粒

勇士營每年徵子粒銀一百五十八兩八錢八分。四衛營每年徵子粒銀一百四十八兩八錢八分。二項共三百七兩七錢六分。向作兩營官軍犒賞修置等費。自三十一年內。監徵收造鳥銃等費支用。至三十九年二月始發。營徵收公用。兩營原有循環文簿。上下半年倒換。

各衛逃故

各衛每月投遞糧冊、但有逃故者、另開一手本、文移渙散、不便清查、亦有在營事故、而衛猶食糧、無從究詰、邇來通行各衛、每糧冊外、仍立循環、每月填註送驗、

太僕銀庫

太僕寺常盈庫馬價等項銀兩、本寺少卿堂會同京營_{道科}兵部主事臨庫照數收放、登記簿冊、每春秋二季投查、

各城贓罰

本_{道科}批發詞狀、并發審人犯、一應紙贖銀兩、及無主入官贓物、皆該司收貯、聽候動支、置立循環文簿二扇、每雙月二日、差吏齎簿赴署倒換稽查聽用、

聽用等官、雖列名冊籍、多終歲不至、或行迨至年終、妄冀薦剡、徒為捷徑、已經本科立有循環、每月終倒換、以稽勤惰、

會同

馬箭仍舊
閱視

教場新儀
附此

一陞補定例

萬曆二十七年十一月內該兵部題覆協理尚書王條議營官推用宜公每年秋操後將營中見任將領中軍千選把總等官會同巡視衙門先日閱馬箭次日閱步箭近免馬箭止閱步箭仍會同舉劾

一勲爵教習

萬曆元年議

准皇親應襲不必隨營操練又二十七年該兵部題

覆協理尚書王

條議勲官入營宜擇今後凡

勲臣襲爵未管事及應襲并的親伯叔兄弟各官俱遵制送營教習其餘疎族遠房不得一槩濫收每年止二季操畢會同四衙門考試一次勲爵應襲每逢二日進操勲官則逢三六九日進操各習射藝

一會補選鋒

萬曆二十七年十一月內該兵部題覆協理尚書王條議今後三大營雙糧選鋒事故等項

缺出暫懸俟春秋二季操畢行令各副將各將
本營并屬管查有選鋒缺一名各將單糧選鋒
選精壯善射者三名造冊四本呈送四衙門擇
日會同詣五軍營教場將各營候射單糧選鋒
均分二處伺候總科於東廳協道於西廳每人
六矢射中三矢者當廳即給准補某人雙糧名
缺票一張付本選收執一面將姓名登簿案發
收糧仍將中二矢者驗其年力精壯圈記在簿
俟三矢補完查剩缺多寡即以圈記者補之如

圈記者人多缺少仍將圈記之役復較中矢多
者補之近年偶遇三箭補盡缺尚有餘即於二
箭之內隨意點補人心畢竟不服且一年選補
二次既有成例若不遵行而積至一兩年方行
選補人數既多日晷有限必至草率甚非法也
營軍首賴選鋒倍宜加意

一替補新軍

替補軍役舊規先由總協衙門受狀准理遞次
赴各衙門過驗經歷兩三月方補一軍使費多

門苦累不堪四十一年公定會驗之法每月總
協科道一處戶兵兩廳一處同日齊赴射所選
驗新軍精壯者即時給票執赴戶兵兩廳過驗
當日查對收糧着伍老弱者退之許令下月壯
丁替補極為省便

馬政

一沿革大略

先年三大營倒馬每年行令該營買補六百匹
由兵部車駕司准送科道查驗方赴太僕寺印

烙如有一衙門不准即還本商另行買補以致
軍有陪養之苦商有伺候之煩是以召買愆期
一二年尚不足數後奉題

准事例會同部寺每月逢九日在演象所招集各商

會同估買自萬曆二十五年該前任

科劉道周

題

改凡三大營倒變馬匹每年共查耗缺若干先

該總督疏

請抄送兵部及巡捕營提督亦將各地方缺數具呈
到部類齊覆給新馬

命下日、劄委馬政主事一員、揀選殷實精壯軍選、每
二名選定一名、面給小票、會同太僕寺京營堂
將東西二路調到寄養馬匹、掣籤充領、後每軍
一名給與馬勘合一張、完日即赴本科道過堂
仍將兵部給過各勘合齎驗、如有頂冒遺失等
情及不合格冊者、究罪、倘或倒死、即照勘合年
分追椿、如本軍事故或喂養不堪、該營查驗另
給別軍前赴部寺馬政廳更名用印鈐蓋、付本
軍收執、若遇十年例該大換一次

一倒失驗割

三大營馬匹走失被盜者、責令買補、倒死照例
納椿、半年之上追銀四兩三錢、一年以上追銀
四兩二錢、一年以上追銀二兩五錢、五年以上追銀
一兩五錢、十年以上追銀一兩、五年以上免
追、仍赴廳決打割蹄、惟當年充領新馬間有倒
死、該管把總先與呈明、批行查究、果無別故、方
准納椿、近例不及半年倒死者、責令買補

一捕營買補

補營馬匹草料每匹銀八錢三大營每匹止六錢故比三大營較多不論遠近倒即買補近奉題

准俱照三大營納椿事例內有本軍願買補者聽

一補營轉兌

巡捕營馬軍事故遺下馬匹比照三大營事例呈明本科道責令同隊殷實軍人告領將官詳給改填勘合

一年終印烙

三大營巡捕營馬匹舊係一年兩次印烙萬曆七年題

准春操畢隨便點閱秋操後會同舉行每年十一月初旬太僕寺請赴演象所先一日兩衙門同行以後輪往驗馬之肥瘠擇其年近而瘠者責之未印之前半月行牌各營取造烙馬文冊仍令將官徑查兌領年月馬匹毛齒并臙瘦等第明註於各軍之下以便查比舊時醫獸在傍報齒殊為可厭且難免於需索之弊已經裁革不用

其勇士四衛管馬匹舊止屬太僕寺印烙後題
准照大營事例會同科道部寺印烙數日供給係大
營子粒銀兩動支本營委官辦備勇士四衛營
供給另動本營子粒銀兩張家灣守備下馬匹
原係大營分屬亦在射所會烙大約須用半月
之期可完

班政

一班政沿革

班軍更番入衛宣德元年計有十六萬之數至

嘉靖時止七萬九百餘人歷年以來消耗殆半
自正德末年因山陵工作始肇撥工之役而營
操漸虛矣查萬曆二年兵部議

准班軍皆令隨營操備仍咨工部內官監非遇重大
工程不得輕議撥用又萬曆八年題

准班軍免撥工役乃時寧令疎沿習為例一切不急
之務俱援以請而班軍盡化為烏有萬曆四十
一年六月內該本

科張道史

目擊班務虛耗撥工

冒濫題為春秋班軍原備戰守派撥工作應請

明旨懇乞

聖明嚴行申飭以懲虛冒以實營伍事該兵部覆議
得以後班軍到京聽管班員外照冊點驗盡發
營操一應工程俱工部自募民夫應役隨准該
部於鳳陽撫按申明留班糧銀疏內覆請得
旨本年八月內又該本科張題為查叅領班官員
並陳末議以覈軍實以裨國計事因春班各都
司虛軍冒餉將孔弘度等叅革以後各軍須從
實報名不得仍前虛冒發營操練不得仍前撥

工永為定例一時行伍似亦煥然改觀但內監
人等無日不垂涎此軍願當事者守此堅如金
石可也

一銀糧額數

春班

山東領班都司一員劄付官九員濟南等九衛
所原額班軍共六千一百二名除安家外共該
解京糧銀一萬七千五百六十二兩九錢

中都領班副留守二員劄付官一十七員留守

中等一十七衛所原額班軍共一萬三千六百
四十二名除安家外共該解京糧銀三萬六百
四十三兩五錢六分

秋班

山東領班都司一員劄付官一十七員登州等
一十七衛所原額班軍共五千九十三名除安
家外共該解京糧銀一萬二千九百三十四兩
八錢二分

中都領班副留守二員劄付官一十二員宿州

等一十二衛所原額班軍共一萬二千七百六
十名除安家外共該解京糧銀二萬八千三百
八十八兩二錢

河南領班都司一員劄付官六員宣武等六衛
所原額班軍共二千七百二十一名除安家外
共該解京糧銀二千八百八十二兩八錢八分
以上各軍行糧自到京報名赴標之日為始
雙月折色每軍銀二錢銀錢兼支赴太倉銀
庫關領單月本色戶部坐派倉廩每軍支米

四斗春操以五月初九日止秋操以冬至日
止冊領俱赴本道掛號冊存領發

一月糧分屬

萬曆八年該本衙門題

准各軍月糧原係在家支二箇月解京十箇月後慮
各軍貧苦衣甲無措議自九年為始在家給四
箇月解京八箇月劄付官舊俱闕茸不堪近兵
部咨劄撫按轉行各兵備道慎選以充仍造履
歷賢否文冊順付各都司齎投抵京入操舊係

另立一營漫無統紀後議分屬山東屬

五軍營河南屬

神樞營中都屬

神機營又訪得往時做工原無人到不過臨期
僱覓折納工價以故內外棍徒乘機嚇詐近改
入營操宜申釐積弊嚴行禁約

一考覈查放

營操將住牌行各都司查各衛所官軍已到若
干未到若干在逃若干口糧若干逐一造冊開

報隨宜綜覈時屆放班再訪各官賢否刻日過堂應處各官俱於年終叅處

賞罰

一各官規格

中軍千把總中一箭不賞中二箭布一疋花二枝中三箭絹一疋花二枝中四箭絹一疋花二枝銀二錢中五箭絹一疋花二枝銀四錢中六箭絹二疋花二枝銀六錢不中者復令補射仍不中責五棍補中免責不賞

賞格
同戎政

一軍士規格

軍士抽籤調隊俱以六矢為率凡弓箭手中一箭賞銀伍分中二箭賞銀一錢中三箭賞銀一錢五分紅布半疋花一枝中四箭賞銀二錢布一疋花二枝中五箭賞銀二錢五分布一疋花二枝中六箭賞銀三錢布二疋花二枝不中者責五棍凡單糧選鋒中一箭賞銀六分中二箭賞銀一錢二分中三箭賞銀一錢八分布半疋花一枝中四箭賞銀二錢四分布一疋花二枝

中五箭賞銀三錢布一疋花二枝中六箭賞銀三錢六分
布二疋花二枝不中者責七棍凡雙糧選鋒善射頗多中一箭者不賞中二箭賞銀五分
中三箭賞銀一錢中四箭賞銀一錢五分布半疋花一枝中五箭賞銀二錢布一疋花二枝中六箭賞銀二錢五分
布一疋花二枝不中者責十棍

一火器規格

凡調火器選鋒中二鎗炮賞銀二錢四分布半

疋花二枝中一鎗炮賞銀一錢二分三等責七棍
凡調火器手軍中二鎗炮賞銀二錢布半疋花二枝中一鎗炮賞銀一錢三等責五棍
凡調短兵手軍一等賞銀五分二等賞銀三分三等責五棍

一勇衛各官規格

中軍把總中一箭賞布半疋花一枝中二箭布一疋花一枝中三箭弓一張折銀四錢花二枝中四箭弓一張折銀四錢加布半疋花二枝中

五箭弓一張折銀四錢加布一疋花二枝中六
箭弓一張折銀四錢加布二疋花二枝不中箭
者復令補射仍不中者責五棍補中免責不賞
一軍勇規格

中一銃賞銀一錢中二銃賞銀二錢不中者責
五棍

奏繳

年終復命

月前移手本至武庫司取柴炭完欠數行文大號

頭取三大營花紅馬匹數太僕寺常盈庫官取
收放數十二月望左右三大營勇士四衛管巡
捕等官并勲戚聽用官領班官各衛掌印指揮
僉書管屯經歷等官考察過堂鎖署料理用題
奏各一本內奏本冊徑送兵科舉劾將領一本
號頭中軍等官一本巡捕領班一本勲爵應襲
并勲官一本聽用官一本衛官一本查叅馬匹
一本瘦損一本查叅柴炭一本大糧一本事蹟
一本紀錄一本領班官舊止都司近於萬曆八

年七月內題奉

欽依凡劄付官賢能者舉一二人各項條陳曾奉

明旨裁革果有關係事情不妨具陳其揭帖之數計

送

內閣每樣各一本兵部大堂職方司都察院三堂

與該科存科擇緊要者各送一本寫本六人工

食各二兩三錢總管者加賞五錢寫揭帖人數

不等每人六錢事完之日票行大號頭於子粒

銀兩支給封署數日供給該管號頭差買辦官

逐日辦送完日造冊查考

軍政

五年考選軍政科准通政司經廳手本道奉都

察院劄付俱係兵部轉行取旗手等八十一衛

所官員賢否除牌仰各掌印官造送外內守衛

官付之

皇城巡視其內外將領等官不與軍政者不註止將

見任官員行各衛所取履歷空白揭帖二本一

送部堂一送武選司其攢造書役約十餘人歷

半月可完工錢并青殼裝裁約用銀四兩餘完
日票行大號頭支給如揭帖猝難造完不妨兩
次送去至於三大營勇士四衛營巡捕營副叅
以下號頭而上職方司例取賢否止擇衰懦不
謹者用手本開具考語二本分送部堂該司以
憑考察提督副將自陳抄案轉行而副叅等官
通候本道過堂

大閱

沿例三條

三年

大閱正月二十日邊該兵部具題得

旨連送職方司該司移手本知會本科道即牌行廉
能委官將五軍等營副叅遊佐坐營號頭中軍
千選把總及領班都司等官查三年之內陞任
及見在咨訪平昔賢否有劾無舉止將不肖者
查明用空白揭帖封送過部以憑會同考察又
查三十六年賞罰等第馬步各中一箭二箭三
箭者定為一等量加獎賞馬上中一箭二箭三

箭而步下不中。步下中箭而馬上不中者。定為二等。姑令策勵馬步俱不中箭而騎射可觀。膂力亦稱者。定為三等。量加罰治。其馬步不中箭及中箭而平昔不謹者。照例議處調降。黜退差操等因奉

聖旨。是這各官既經閱視停當。一等的照例賞鈔二等的姑准策勵。三等的罰俸二箇月。不謹的依擬降調黜退。欽此。

又查萬曆九年三月初三日

聖駕躬臨大閱。甄別將品。考校軍藝。其一應事體繁

重載在

大閱錄可查本差

禮科張
浙江道蘇

各賞銀十兩一表裏又

大紅織金胄背。鴻鵠羅一件。又大紅織金胄背。獅牙羅一件。

萬曆四十二年二月初四日。准兵部職方司手本內稱。卷查萬曆九年

聖駕親臨大閱。十二、十五、十八、二十一、二十七、三十三、三十六等年。俱於三月內遣司禮監官

一員前去會同閱視至萬曆三十九年例當閱視該本部循例具題未蒙

欽依遂行停止今照四十二年又當閱視之期例該

舉行等因正月二十一日太子太保本部尚書

王等具題二十五日奉

聖旨是着司禮監太監李去欽此後因國喪傳免

雜事

一紙張季領

兩衙門所用紙張按季總差官執紙單赴都察

院經廳關領

一將官患病

將官患病具呈本衙門隨批別將官查勘如果是實例該戎政衙門會稿彼此商同一齊具題若中軍等官則戎政徑易之矣

一文移體式

凡照詳公文過十五行者酌用似由書冊一本以便批閱

一刑具紙劄

一刑具心紅紙劄等項科道到任日票行宛大二縣取用一次其餘一應公用卷架箱紙劄筆墨等項俱行該號頭取用

一公署房租

一本署前房租銀約四兩有奇以為土地祠朔望香燭之費

一例送燭炭

一年終差滿本科道各例送同衙門燭炭動支項下贖銀行城封送不足自補

一瞻拜酒席

一正月初二日瞻拜國學春秋二季祭丁俱票行該號頭照常備飯六科應用其春分祭朝日壇秋分祭夕月壇夏至祭方澤壇止六科都掌科與祭其酒席亦行該號頭備辦又科差滿日例有謝差公宴在於燈市擺設近議改於春間隨便設席郊外更免塵囂

一謁陵馬匹

清明霜降兩衙門謁陵例各撥大營馬四十

匹分送

一營官獎勵

凡營官陞任副將獎十二兩叅遊佐坐各八兩中千把總陞守提者各六兩內轉者不獎酌量行

一解官獎戒

凡各省直解馬價子粒等銀各官完解無欠少者例有獎勵如短少及違限者發兵馬司叅問一額設員役

科道書吏共六名科差書辦一名辦吏二名道差書辦二名辦吏一名其工食銀兩係大營取給辦吏役滿日隨用手本過部聽差官各八員看廳軍各三名厨子各三名俱係大營軍皂隸各四名工食例該宛大二縣額派支領跟辦各一名原無額設工食以贖銀給之

一年終犒賞

年終差滿奏繳各員役人等例有犒賞銀兩票行大號頭分給

一陞轉犒賞

凡^科道在差陞轉各員役人等例有犒賞票行大號頭取給

一公署建置

巡視公署一所坐落於西華門西南兵馬司衙門坐北向南係嘉靖九年^{科王}道王創建有增城湛大史記其事如有損壞量動該營子粒銀兩脩理以前無考近該三十五年科常熟翁三十九年^{科廬陵彭}道太倉錢四十一年科鄒平張俱

少加脩葺

一醫官查點

三大營額設醫官共三十一員各有跟用軍伴分班進營施藥仍聽本科道按季查點以察勤惰

紀要

謂凡要緊規矩及文移有關係可垂久遠者前俱無攷得虞城楊公三篇并其首余二篇附載後之同志者不妨續入云

稽查四衛管馬匹

萬曆二十二年給事中楊記

京營馬匹之數大都難查惟四衛營為甚蓋本營係護衛親軍若軍若馬盡屬內相占用扣剋月糧草料年久弊深軍馬俱無而月支錢糧不減也故本營將領雖設實為文具往日巡視衙門亦視為痼疾漫不省視間或下營查理彼先為偵探僱人覓馬搪塞一時而其弊竟牢不可破也余憤然與何道長曰吾輩既濫竽是役矣詎可效往時草草裁除不時按其營伍外仍下

令期於某日赴演象所查點馬匹屆期點驗毫無印痕余心知其偽也乃命割耳為記每馬截耳二寸許曰嗣後點馬無耳者即真官馬也初時諸軍僱馬一匹賃價五錢及聞割耳加至二兩無有賃者各占用之家不得已乃私出御馬監馬應點至則肥白高大迥絕羣馬余探知其故第佯為不知一槩割截惟時諸內相不勝嗔怒曰今年巡視科道大膽敢割

御用馬耳欲以

上聞有某司禮止之曰彼點營馬耳與

御馬何干且御馬何以至彼營哉事遂寢自此番點後該營乃始凜凜知有法度彼缺耳之馬不敢

獻

上應為營中實物矣大都承平既久法紀廢弛人數千名馬數百匹徑可徒寄空名利入私人之手諸弊可類推矣作奸者罪固不可逃而怠忽於初因循於後遂至莫可救藥豈非吾儕漫不巡視之過哉故紀其大略以告後之同事者慎無

忽於該營云

萬曆四十一年余叨役巡視該營寥寥馬數匹問之則詭云下桃花口圍隨金鞍大馬余乃嚴提該總逐名拘驗馬稍集年終烙印余同太僕郭朗山車駕魏鵬池心知其偽乃取冊開嘉靖隆慶年及萬曆初年者悉行變賣共一百三十匹蓋該營馬俱內監包占及印烙時多借

御用馬充數往俱不深究故馬有五六十年不倒死開除者乾沒錢糧不知多少今次變賣數多雖

不割耳而草料冒破為之少清矣

議處替補良法以恤貧軍

萬曆二十二年給事中楊記

按營軍十萬衰老不堪者居半焉余惟根本重地也而行伍不振至此乎乃呼老軍問曰寒夜長途汝等披冒風霜荷戈入伍勞苦甚矣豈無強健兒郎可替役乎老軍泣曰非不願替苦費用太多力不能耳余問故曰每當告替本營有費巡視衙門有費兵部驗軍廳有費戶部下糧廳有費大約五六金方可足用貧軍無措皆倍

息稱貸他人者又驗軍廳一月一驗而吏書求索無厭故遲一日則悞一月如此者常至半年下糧廳亦復如是大率年餘方可得糧及其得糧而向所稱貸者又指此月糧為償二年之後方得食糧貧軍身在伍中他無所管兩年無糧斃也久矣以是延捱歲月至老不敢告替也余喟然嘆曰法敝一至於此諭之曰今令若等不費一錢不出旬月完事可願替乎軍復垂泣叩首曰何可得也余曰第具狀告替吾自有善處

之方次日投告者以數千計旬日間可四五萬人余俱准批該營揀選呈報嚴令不許求索分毫乃又題奉

欽依本衙門與驗軍廳下糧廳同日舉事每遇選軍日期同赴演象所公座相連而設本衙門居中下糧廳居左驗軍廳居右每一軍至前本衙門選中驗軍廳即收入軍冊下糧廳即收入糧簿其驗選之日即為得糧之日也是往日遲之歲月不得者今一旦完之無餘矣軍乃感激頌德

舉手籲天以為一時盛事次日余下營按各部伍而厄羸待斃之人悉化為投石超距之夫矣余復喟然嘆曰道固不在人哉慮此法之久而變也識之以俟後之同志者擇焉

練火器以精長技

萬曆二十二年給事中楊


營中以火藥為長技每遇操日炮聲震動

大內初不知其悉偽也余就而觀之則見每軍持火鎗一枝每班設木的一面一營火兵凡數百人齊手舉放聲如迅雷然火鎗中殊無一粒彈子

火藥之獎

也彼木的森列皆虛器耳余嘆曰教演火器凡以稽工拙備緩急也今彈子且無何論中否二百年來十萬大衆炫虛作弊杳無稽查良可嘆哉蓋緣營中原有鉛彈錢糧把總官侵為己物故軍士徒持虛器徒糜火藥於射打之實毫無有也余乃命操日每軍必給鉛彈十枚每班祇持火捻一根相傳點放把總官持簿記其中否射打不完不得隨大營放散中多者即時加賞屢試不中者本軍及把總各有責焉自是火器

練選鋒



乃不為虛設而軍士可進於技矣按練兵莫先於練膽而教藝則練膽之要方也夫惟藝高則膽大膽大則視敵人為易與而摧鋒陷陣恒必由之矣余初至營索諸軍武藝閑熟者為教師而十萬人不得一焉余不勝慨嘆乃下令廣貢教師都城九門各出示招徠於是四方能者雲集響應爭獻所長余試而收之布之各營每教師一人選年力精壯手足便捷者十人從學焉然軍士猶安於積習有苦難態余

曰人情無所利雖軀之不前也復下令曰軍士學藝有成當具

題添選鋒千人而武藝不精者不與焉於是乃各

貪雙糧之利旬日報名學藝者以萬餘計矣舊

例五月初旬住操巡視者亦不下營自教藝之

令一下軍人乃不憚炎暑苦心學藝都城內外

水際柳邊莫非馳馬試劍拈鎗弄棒者即五尺

童子亦往往持麻竿街頭跳躍余視之不勝喜

慰乃不時檄某將官赴營較藝余就而試之軍

士爭先售技常至薄暮不完事以燈炬送余歸

焉試而能者自將官及教師軍士各有賞賚而

各營益加鼓舞每至營中在在稱比戈擊搏斗

喊之聲震動遠邇如此凡五越月無少間余乃

會總協衙門分管比試凡入選者一千人題奉

欽依各食雙糧而軍士之銳氣勃勃各有以一當十

之勇焉余鼓掌笑曰有軍若此雖以之撼太山

可矣然入選者雖止千人而學藝者則尚餘數

千人余懼其久而廢弛也又各加比試列尖哨

等第存為卷案凡選鋒有缺照案次挨補如學
官增付補廩之例馬臨時試不中者又挨次而
下立定規嗣是而鼓舞不倦歲加較閱高下
黜陟一如文學歲考法將見軍士希為尖哨尖
哨希為選鋒不俟督責各相競勸而營兵可長
振不衰矣余薰後之同事者踵而行也故不辭
刺刺遺笑焉

清查捕營軍馬以重巡哨

萬曆四十一
年給事中張
揭

竊惟捕營一軍原為京城干柳警邏之用非為

捕營
投充一節

官員騎坐薪水之供不知起自何年縉紳大馬
水夫等項皆私撥營軍而營軍以下夜為苦差
往往躲重就輕投充日衆行伍為之漸空矣該
前任巡視歸掌科條陳捕務內一款杜投充之
習隨該兵部覆前件看得捕營役占之馬始則
請之主者繼則遞相轉送而不可問且又以營
馬代郵傳以軍中旗吹代行者之儀豈不絡繹
在途而不知陪累之苦則貧軍受之凡撥一軍
一馬往返必經二日裹糧而從即一月關領金

錢能供幾次差撥乎。本部近將旗吹小馬已行裁革以後凡有請託干求旗吹小馬等項槩行杜絕。營官不許仍前徇情私送。自干法紀。遇有各衙門奉差出使陞轉等官。將原占軍馬送回本部發伍。下夜當差回京之日不得仍前取用。如奸軍不遵禁令。夤緣投充者。該總即時呈稟以憑嚴究等因奉

聖旨京師巡捕關係緊要。這所奏俱依議着實行。有怠玩抗違的着叅來重治。欽此。

赫赫明旨昭如日星矣。乃今職承乏巡視三閱月餘。諸縉紳先後出京不一。未見匹馬一軍還營。仍復紛紛轉送。甚及粟監皆得竊占。冒濫已極。隨行中軍劉渠清查兩營。見充大馬三百六十七名。水夫三百一十八名。一馬必有一軍。則是占軍共六百八十五名矣。額設行伍能有幾何。堪此久假既經題明。合行申飭。除已用者勢難遽返。今後諸縉紳出京之日。煩將遺下軍馬聽查着伍。不得轉送。職決不敢以

朝廷額軍。擅作私情。其該營大小將領。如有仍前私占。及擅自轉撥。職體訪得知定。以白簡治之。庶夜巡有賴。營務有裨。

慎重盜情

萬曆四十一年給事中張

告

照得巡捕營。原以捕盜為事。故各官以獲盜為功。本科叨任巡視以來。見捕營解各把總所拏賊犯到署。細心研審。其中情真罪當者固多。而威逼強招者不少。及送法司。槩多牽斃。而無辜之民。遂為含冤之鬼矣。又如本竊盜也。必捏報

為強賊。原小偷也。必虛張為神盜。本無賊也。而妄栽以銀錢。本無主也。而賄栽假失主。原其意不過要功。為紀錄陞遷地耳。古云一將功成萬骨枯。今但為一紀錄。而枉殺平民。損傷天理。莫大於是。昔宋眉州攝叅錄程仁霸部民有盜蘆服根者。所持刃誤傷主人。尉幸賞以劫聞。獄掾受賕掠成之。公知其冤。謂盜曰。盍訴冤。吾為汝直。盜果稱冤。遂移獄。公直其事。而尉掾爭不已。後移獄。竟論殺盜。公因罷歸。而尉掾遂暴死。後

三十餘年。晝見盜伏於庭下。曰。尉掾未伏。待公而決。前地府欲召公暫對。我叩頭爭之曰。不可以我故驚公。今公壽已盡。我為公荷擔而往。暫時即生人。天子孫祿壽朱紫滿門。言訖。公沐浴衣冠就寢而卒。子孫壽皆至九十。曾孫皆為顯官。有聲同時為監司者三人。夫尉掾以倖賞。暴死仁霸。以直寃昌。後恢恢天網。疎而不漏。可不慎諸。又近日右哨王把總。捉獲真賊。尚四起。有弓刀儘可招解。乃聽積番范海李鸞等妄扳良

民趙淮等。寄賊打詐一十二家。浪追錢萬餘。解署被本科審出真情。拘被害對質。一一輸服。無辭。已將范海等責革。叅送法司擬罪。平民釋放。外為此示諭該營各官。以後拏獲真正強竊。即行解處。不許任意拷打。平民描陪。捉賊屈死。非罪倖圖陞賞。蓋地方但以警邏無事為職。不以獲賊起數多寡論功。明有王法。幽有鬼神。各宜平心省改。敢為視為故紙。以人命為戲者。審出定行叅究。決不食言。

本差書辦魯夢鰲對同
楊元刊住石駙馬街

巡視京營事宜終